

NEWSLETTER

OLIMPIJSKOG KOMITETA BIH

No.5 novembar/decembar 2020



UVODNA RIJEČ PREDsjedNIKA OO BIH

Poštovani sportaši, sportski radnici i ljubitelji sporta,

Čast mi je obratiti se sa uvodnom riječi pete edicije Newsletter-a Olimpijskog odbora Bosne i Hercegovine, u kojem vam donosimo mnoštvo aktivnosti usmjerenih ka unaprijeđenju bh. sportskog sustava. Također, želim napomenuti da je Olimpijska porodica ušla u novi olimpijski, četvorogodišnji ciklus, 2021 – 2024 uz jasne

ciljeve koji su, uz prilagođavanje djelovanja, usmjereni ka prevazilaženju svih izazova suvremenog svijeta čiji smo svjedoci.

Olimpijski odbor BiH je u proteklom periodu održao Izvještajnu i Izbornu sjednicu Generalne skupštine OO BiH, u skladu sa epidemiološkim preporukama nadležnih tijela. Izabrani su novi organi i tijela Olimpijskog odbora BiH za mandatni period 2020 – 2024, koji će, bez sumnje, voditi OO BiH sigurnim putem unaprijeđenja i pozitivnih promjena. Također, konstituirane su i održani su prvi sastanci sljedećih komisija Izvršnog Odbora OO BiH: Komisija za vrhunski sport, Zdravstvena komisija, Komisija za projekte, Komisija za međunarodne odnose, Komisija za fair-play, Komisija žena i sport, Komisija za marketing i Komisija za edukaciju, čijim će se radom ojačati sportski sustav BiH.

Projekti iz prethodnog kvadrenijala su uspješno finalizirani i trenutno se rade pripreme na novom programu Olimpijske solidarnosti koji će biti operativan u periodu 2021 – 2024.

Svakako za nas najbitniji projekti usmjereni prema podršci našim najboljim sportašima-stipendistima, se odvijaju nesmetano i u kontinuitetu.

U prethodnom periodu, naši sportaši i sportski strukovni savezi su također zabilježili niz izuzetnih uspjeha na natjecanjima koja su održana u specifičnim okolnostima. Stoga smo odlučili organizirati manifestaciju “Vrhunski sportski uspjeh u 2020. godini”, kako bi im ukazali čast na predanosti, i njihovom nesebičnom radu i zalaganju, uprkos nesvakidašnjim uvjetima izazvanim pandemijom.

Sa posebnim zadovoljstvom i radošću u obnovljenu zgradu Olimpijskog muzeja primili smo niz zvaničnika, sportaša i sportskih radnika čije oduševljenje je još jedna potvrda značaja očuvanja i unaprijeđenja olimpijskog naslijeđa Bosne i Hercegovine.

Iako je u ovom vremenu nezaobilazan uticaj COVID-19, Olimpijski odbor se odlučno nosi sa izazovima vremena te uspijeva da unaprijedi aktivnosti usmjerene ka našim sportašima i savezima koji su esencijalni segment sportskog sustava svakog društva. Na naše veliko zadovoljstvo, podržali smo i mlade olimpijske nade, te im dali podstrek u duhu Olimpizma da nižu sportske uspjehe u skladu sa sloganom **BRŽE, JAČE i VIŠE.**

Naš rad u prethodnom periodu sublimirali smo kroz mandatni izvještaj čija publikacija je trajno svjedočanstvo posvećenosti i istrajnosti rada OO BiH. Veliko je zadovoljstvo da smo za isto dobili i pohvale od nadležnih, domaćih i međunarodnih instanci.

Sve navedeno nas podstiče i obavezuje da svoj rad i u budućnosti konstantno unaprijeđujemo, da budemo pokretači pozitivnih promjena i kuća sporta otvorena za sve pozitivne inicijative i djelovanja na dobrobit sporta i sportskog sustava Bosne i Hercegovine.

Dragi prijatelji, želim vam dobro zdravlje i mnogo uspjeha u prevazilaženju svih izazova sa kojima se susrećemo, sa molbom da poštujuete mjere zaštite od COVID-19 i ostanete zdravi zajedno sa vašim porodicama.

Sportski pozdrav,

Marijan Kvesić

Predsjednik OO BiH



PORUKA PREDSJEDNIKA MOK-a, dr Thomas-a Bach-a



Pogledajte poruku Predsjednika Međunarodnog olimpijskog komiteta dr Thomas-a Bach-a sa mjesta održavanja narednih Olimpijskih igara Tokyo 2020, na ovom [linku](#).

Napominjemo da će se Igre održati od 23. jula do 08. avgusta 2021. godine.

OLIMPIJSKI KOMITET BOSNE I HERCEGOVINE ŽELI VAM SRETNE NOVOGODIŠNJE PRAZNIKE!



REDOVNA I IZBORNA SKUPŠTINA OK BIH



OLIMPIJSKI KOMITET BIH ODRŽAO REDOVNU I IZBORNU SKUPŠTINU


U prostorijama Olimpijskog komiteta Bosne i Hercegovine održana je 5. Generalna skupština Olimpijskog komiteta Bosne i Hercegovine na kojoj su prezentirani i jednoglasno usvojeni „Izveštaj o radu OK BiH,“ i „Finansijski izvještaj OK BiH,“ za prethodnu godinu, kao i “Plan rada OK BiH” i “Finansijski plan OK BiH”.

Imajući u vidu da je usvajanjem navedenih izvještaja formalno završen mandatni period organa i tijela OK BiH, prezentiran je i sveobuhvatan Izvještaj o realizovanim projektima OK BiH i učešću naših najboljih sportista na višesportskim olimpijskim takmičenjima u četverogodišnjem ciklusu 2016 - 2020.

U ovom mandatnom periodu Olimpijski komitet BiH je uspješno realizovao 117 sportskih, edukativnih i infrastrukturnih projekata, te učestvovao na 10 višesportskih takmičenja sa 177 sportista, koji su osvojili 7 medalja.

OK BiH je u ovom periodu stipendirao 35 vrhunskih sportista, te podržao rad strukovnih sportskih saveza BiH kroz implementaciju brojnih projekata. Tokom skupštine, u članstvo OK BIH svečano su primljene i dvije nove članice: Cheerleading savez BiH i Karate savez BiH.

Nakon završetka 5. Generalne skupštine OK BIH održana je Izborna skupština OK BiH, na kojoj su izabrani organi i tijela OK BiH za novi četverogodišnji ciklus (2020 – 2024).



U Predsjedništvo OK BiH su izabrani gosp. Marijan Kvesić, prof.dr Milanko Mučibabić i prof.dr Izet Rađo koji su dobili podršku za vođenje krovne sportske institucije u narednom periodu, a pored njih, u Izvršni komitet OK BiH su izabrani: dr. Nihad Selimović, Mirsad Ćatić, Elvedin Begić, Slobodan Grahovac, Edin Krupalija, Ivan Brkić, Kornelija Leko, prof. dr Goran Bošnjak, prof. dr Branislav Crnogorac i Nada Kujundžić.

Poučeni iskustvima MOK-a i EOK-a i poštujući sve epidemiološke mjere, sjednice su održane tzv. hibridnom, odnosno kombinovanom metodom uz fizičko prisustvo i online putem aplikacije "Zoom".



PREDSTAVLJAMO ČLANOVE PREDSJEDNIŠTVA I IZVRŠNOG KOMITETA OLIMPIJSKOG KOMITETA BOSNE I HERCEGOVINE ZA MANDAT 2020-2024



PROF. DR MILANKO MUČIBABIĆ
POTPREDSJEDNIK



MARIJAN KVESIĆ
PREDSJEDNIK



PROF. DR IZET RAĐO
POTPREDSJEDNIK



PROF. DR BRANISLAV CRNOGORAC
ČLAN



KORNELIJA LEKO
ČLAN



MR. SCI. DR NIHAD SELIMOVIĆ
ČLAN



PROF. DR GORAN BOŠNJAK
ČLAN



ELVEDIN BEGIĆ
ČLAN



MIRSAD ČATIĆ
ČLAN



IVAN BRKIĆ
ČLAN



NADA KUJUNDŽIĆ
ČLAN



DR SLOBODAN GRAHOVAC
ČLAN






MR.SCI. EDIN KRUPALIJA
ČLAN



KOMISIJE IZVRŠNOG KOMITETA OK BiH

Izvršni komitet OK BiH je u skladu sa Statutom i Poslovnikom o radu formirao sljedeće komisije OK BiH: Komisija za vrhunski sport, Zdravstvena komisija, Komisija za fair-play, Komisija za marketing, Komisija za edukaciju, Komisija za projekte, Komisija žena i sport, te Komisija za međunarodne odnose.



Sve Komisije su održale konstituirajuće sjednice te predložile planove rada za narednu 2021. godinu.



Puni saziv komisija kao i organa i tijela Olimpijskog komiteta Bosne i Hercegovine možete pogledati na ovom [linku](#).



SMJERNICE ZDRAVSTVENE KOMISIJE IK OK BIH ZA VRHUNSKE SPORTISTE, NJIHOVE LJEKARE I TRENERE

Zdravstvena komisija Olimpijskog komiteta BiH preporučila je smjernice za vrhunske sportiste, njihove ljekare i trenere, a koje se odnose na postepeni povratak na teren nakon infekcije koronavirusom koja može stvoriti različitu kliničku sliku, od asimptomatskog do kritičnog oblika bolesti Covid-19.



“Posljedice zbog preranog povratka na teren nakon koronavirusa mogu biti fatalne za sportiste. Naime, često u želji ostvarenja vrhunskih rezultata sportisti zanemaruju svoje zdravlje. Motivisani željom da pomognemo našim sportistima, komisija je kreirala protokol postepenog povratka na teren nakon zaraženosti koronavirusom. Bitno je učiniti odgovarajuće dijagnostičke procedure u određenim momentima, kako bi se rizik od neželjenog događaja sveo na minimum. Sportisti, klupski ljekari i treneri moraju biti svjesni dužine i težine povratka na teren”, kazao je doc. dr. Dženan Jahić, predsjednik Zdravstvene komisije OK BiH.



Mr. sci. dr. Nihad Selimović, član Izvršnog komiteta i koordinator Zdravstvene komisije OK BiH, kazao je da ovaj protokol predstavlja prvi dokument ove vrste u BiH.

“U njemu su sublimirana iskustva respektabilnih svjetskih institucija i kao takav trebao bi imati veliku primjenu u našem sportskom sistemu. Protokol prije svega treba da posluži našim sportistima, ljekarskim timovima u sportskim klubovima i reprezentacijama. U njemu su definisane jasne smjernice kada sportista nakon preležane bolesti uzrokovane koronavirusom može da se vrati na teren”, kazao je Selimović.

Dokument u cjelosti možete preuzeti [ovdje](#).

Osim doc. dr. Jahića i mr. sci. dr. Selimovića u izradi protokola učestvovali su i ostali članovi Zdravstvene komisije OK BiH i to: prof. dr. Reuf Karabeg, prim. dr. Taib Delić, doc. dr. Marko Ostojić, prof. dr. Adnan Hadžimuratović, mr. sci. dr. Semin Bećirbegović, mr. sci. dr. Anes Talović, prof. dr. Gordana Bukara Radujković, doc. dr. Vedran Markotić i mr. sci. dr. Jelena Soldo.

AKTIVNOSTI OK BIH

MANDATNI IZVJEŠTAJ 2019 - 2020



Naš rad u prethodnom periodu sublimirali smo kroz mandatni izvještaj 2019 – 2020 čija publikacija je trajno svjedočanstvo posvećenosti i istrajnosti rada OK BiH. Veliko je zadovoljstvo da smo za isto dobili i pohvale od nadležnih, domaćih i međunarodnih instanci.

Kompletan Izvještaj možete pogledati na ovom [linku](#).




ZAHVALNICE OK BIH ZA MANDATNI IZVJEŠTAJ 2019 - 2020


Kao odgovorna i transparentna organizacija, naš izvještaj o radu smo dostavili institucijama i našim partnerima sa kojim usko saradujemo gradeći i unapređujući sportski sistem Bosne i Hercegovine. Zadovoljstvo nam je da smo za isti dobili zahvalnice od visokih institucionalnih instanci Bosne i Hercegovine.

Zahvalnica i poruka N.J.E. Ambasadora Johann Sattler-a: Aktivnosti Olimpijskog komiteta BiH važan podsjetnik da su inkluzivnosti i saradnja mogući

Zahvalnica gđe. Ankice Gudeljević, ministrica Ministarstva civilnih poslova Bosne i Hercegovine



*klikom na pismo pročitajte kompletnu vijest



*klikom na pismo pročitajte kompletnu vijest

Olimpijski komitet Bosne i Hercegovine se još jednom zahvaljuje na lijepim riječima i radujemo se nastavku saradnje koja je od neprocjenjive važnosti za sport u našoj zemlji.



MANIFESTACIJA “VRHUNSKI SPORTSKI REZULTAT U 2020. GODINI”

U Olimpijskom muzeju Bosne i Hercegovine, a u organizaciji Olimpijskog komiteta BiH, 17. decembra je održana manifestacija dodjele priznanja za „Vrhunski sportski rezultat u 2020. godini“.

Marijan Kvesić, predsjednik Olimpijskog komiteta BiH, zajedno sa potpredsjednicima OK BiH, prof.dr. Milanko Mučibabić i prof.dr. Izet Rađo, čestitao je svim dobitnicima priznanja koji su, kako je kazao, uprkos svim izazovima i preprekama koje je prouzrokovala pandemija ostvarili izuzetne sportske rezultate.



“Ova dodijeljena priznanja su priznanja za predanost, rad i zalaganje, uprkos nesvakidašnjim uslovima izazvanim pandemijom zbog koje su odgođena mnogobrojna evropska i svjetska takmičenja, pa tako i tradicionalna manifestacija Olimpijskog komiteta BiH - izbor sportiste godine. U protekloj godini izazov je bio otići na takmičenje, a još veći ostvariti vrhunski rezultat i zato vi, dragi sportisti, činite ponosnim ovu zemlju i našu veliku sportsku porodicu koja njeguje olimpijske vrijednosti”, istakao je predsjednik Kvesić, naglasivši da će Olimpijski komitet BiH i dalje podržavati dosljedne, smjele i uporne koji ostvaruju vrhunske sportske rezultate, a posebno je čestitao mladim sportistima koji su bh. javnost pozitivno iznenadili briljantnim rezultatima.



Dobitnici priznanja za „Vrhunski sportski rezultat u 2020. godini“ su:

Košarka:

1. Muška košarkaška reprezentacija BiH

Taekwondo:

2. Klub-TKD Novi Grad Sarajevo
3. Taekwondo savez BiH, specijalna nagrada
4. Fahrudin Adilović
5. Benjamin Husić
6. Ira Grgić
7. Milica Vasić
8. Jelena Vasić
9. Ejla Makaš
10. Muška kadetska taekwondo reprezentacija BiH



Tenis:

11. Tomislav Brkić
12. Marko Maksimović

Plivanje:

13. Lana Pudar
14. Jovan Lekić

Kajak:

15. Dušan Mačkić

Skijanje:

16. Elvedina Muzafherija
17. Aleksa Vuković



Biciklizam:

18. Lejla Tanović
19. Hajrudin Trle, specijalna nagrada

Sankanje:

20. Mirza Nikolajev

Boks:

21. Tara Bohatjuk

Judo:

22. Larisa Cerić
23. Toni Miletić
24. Ognjen Pavlović, specijalna nagrada

Atletika:

25. Amel Tuka
26. Mesud Pezer

Bodybuilding i fitness:

27. Adnan Alagić



Kompletnu vijest pročitajte na ovom [linku](#), emisiju manifestacije na ovom [videu](#), kao i prilog sa intervjuima nagrađenih koji možete vidjeti klikom na ovaj [link](#).

MOK DIPLOME DODIJELJENE UČESNICIMA “NAPREDNIH KURSEVA MENADŽMENTA U SPORTU”

U Olimpijskom muzeju, 17.12.2020. upriličena je dodjela diploma polaznicima prestižnog programa “Napredni kursevi menadžmenta u sportu” koji Olimpijski komitet BiH realizuje u saradnji sa Međunarodnim olimpijskim komitetom.

Radi se o edukativnom programu koji je osmišljen u saradnji MOK-a sa više od 150 svjetski priznatih naučnika i stručnjaka iz sportskog menadžmenta koji je usmjeren na unapređenje rada sportskih organizacija.



Predsjednik OK BiH Marijan Kvesić je istakao da je pored teoretskih znanja i praktične razmjene iskustava koju su učesnici mogli čuti jedni od drugih, jedna od najznačajnijih komponenata edukacije ove vrste upravo međusobna saradnja i stvaranje jakih veza među menadžerima iz različitih sportova, te je dodao:

“Vi ste tim na koji Olimpijski komitet Bosne i Hercegovine može računati i koji će, sigurni smo, primjeniti sva znanja u organizacijama iz kojih dolazite i na taj način doprinijeti unapređenju olimpijskog sportskog sistema u BiH”.

“Sretna sam što sam imala priliku učestvovati u ovakvom vidu edukacije koja je u velikoj mjeri unaprijedila moje znanje i koja na najkonkretniji način doprinosi kreiranju povoljnijeg ambijenta za razvoj sporta u Bosni i Hercegovini. Lijepo je bilo družiti se u prethodnih 6 mjeseci i razmijeniti iskustva sa kolegama iz sportskih organizacija u BiH” - istakla je na svojoj finalnoj prezentaciji košarkašica Razija Mujanović, koja je 2017. godine primljena u Kuću slavnih Svjetske košarkaške federacije.

Diplome su uručili predsjednik OK BiH Marijan Kvesić, potpredsjednik OK BiH prof.dr Milanko Mučibabić, potpredsjednik OK BiH prof.dr Izet Rađo i generalni sekretar dr. sci Said Fazlagić. Diplomanti Naprednih kurseva menadžmenta u sportu 2020 su: Enes Peštek, Ademir Raščić, Azur Kuduzović, Nijaz Šahinović, Vedran Čubela, Samir Šarić, Senad Hadžimešić, Brane Srdić, Đena Arifović, Razija Mujanović, Kornelija Leko, Selma Karčić, Amela Bajrektarević, Ajša Alić, Hana Novalija i Anel Imamović. Više na [ovom linku](#).



DVIJE NOVE MLADE BH. NADE U PROGRAMU STIPENDIRANJA OK BIH

U sklopu projekta “Podrška mladim olimpijskim nadama”, OK BiH je uvrstio još dvije perspektivne sportistkinje Lanu Pudar (plivanje) i Adu Avdagić (taekwondo).



Lana Pudar je rođena 2006. godine u Mostaru. U 2019. godini postala je osamnaestostruka državna prvakinja u konkurenciji mlađih juniorki i dvostruka prvakinja u seniorskoj – apsolutnoj konkurenciji. Lana Pudar je samo u 2019. godini obarala državne rekorde čak trideset puta. Najbolje vrijeme u Evropi u 2019. godini ima u disciplini 100m delfin i među tri je najbolje plivačice u Evropi u svom uzrastu.



Ada Avdagić je rođena 2005. godine u Sarajevu. Od 2012. godine aktivno trenira u Taekwondo klubu Sarajevo. Nosilac je crnog pojasa I DAN. Među mnogobrojnim rezultatima izdvajamo bronzanu medalju na Evropskom kadetskom prvenstvu 2018. godine. Na međunarodnim G turnirima osvojila je 7 zlatnih, 2 srebrene i 2 bronzane medalje, na turnirima A klase 8 zlatnih i 3 srebrene. Višestruka je prvakinja BiH u mlađim kategorijama.

Želimo im mnogo sportske sreće i uspjeha na putu ka seniorskim selekcijama Bosne i Hercegovine.

AMEL TUKA U POSJETI OLIMPIJSKOM MUZEJU

Najbolji atletičar u historiji Bosne i Hercegovine Amel Tuka posjetio je obnovljenu zgradu Olimpijskog muzeja u Sarajevu.

Tuka nije krio oduševljenje što u Muzeju ima priliku ponovo vidjeti eksponate sa Zimskih olimpijskih igara održanih u Sarajevu 1984. godine, koji podsjećaju na dane najveće slave glavnog grada BiH i olimpijske vrijednosti. Tuku su fascinirali i eksponati sa nedavno održanog Evropskog olimpijskog festivala mladih (EYOF) Sarajevo i Istočno Sarajevo 2019.

Oduševljen sam jer je Olimpijski muzej obnovljen, što sija u ovakvom svjetlu i što ja kao sportista mogu vidjeti šta se dešavalo 1984. godine na Olimpijadi u Sarajevu, jer tada nisam bio ni u planu, a kamo li rođen. Kada vidim ove eksponate presretan sam i pun emocija, dodatnog adrenalina i motiva da ja kao sadašnji predstavnik Bosne i Hercegovine i olimpijac svojim rezultatom doprinesem mojoj BiH. Muzej je doista nešto posebno i poručio bih svim građanima i sportistima, ne samo BiH nego i regiona, da dođu i posjete Olimpijski muzej, da vide tu ljepotu i da dožive taj poseban osjećaj, kazao je Tuka.

Također, zahvalio se Olimpijskom komitetu BiH na dugogodišnjem zalaganju za obnovu ove prelijepe građevine koja je jedan od glavnih simbola historije Sarajeva i Bosne i Hercegovine.

Na [ovom linku](#) pogledajte video Amelove posjete Olimpijskom muzeju.



VLADE DIVAC U POSJETI OLIMPIJSKOM MUZEJU



U novootvorenoj zgradi Olimpijskog muzeja otvorena je izložba „Vlade Divac – od Prijepolja do Springfilda“, u sklopu projekta „Muzejske priče“, čiji je koordinator Grad Sarajevo.

Izložbu su otvorili Vlade Divac, legendarni košarkaš i veliki prijatelj Olimpijskog komiteta Bosne i Hercegovine, predsjednik OK BiH Marijan Kvesić, te gradonačelnik Grada Sarajeva, Abdulah Skaka.

„Sarajevo je grad svih nas i uvijek je lijepo biti u njemu. Drago mi je da su moji prijatelji iz Olimpijskog komiteta BiH uspjeli da obnove Olimpijski muzej koji je značajan, ne samo za Sarajevo, već i za cijeli region“, kaže Divac.

Izložba „Vlade Divac – od Prijepolja do Springfilda“ dio je bogate zbirke koju je Vlade poklonio Muzeju u Prijepolju i koja se mnogobrojnim posjetiocima predstavila stalnom postavkom u galeriji „Vlade Divac – košarkaška legenda“.

„Posebno mi je zadovoljstvo da danas možemo ugostiti našeg velikog prijatelja i jednog od najpoznatijih sportista iz regije Vlade Divca. Želimo posebno da naglasimo i još jednom da se zahvalimo na naporima i zalaganju našeg dragog prijatelja Vlade prilikom lobiranja za dobijanje domaćinstva EYOF 2019 Sarajevo i Istočno Sarajevo. Sa pravom možemo reći da je i zahvaljujući osobnom angažmanu Vlade Divca, barem jedna cigla Olimpijskog muzeja zazidana.“, rekao je predsjednik OK BiH Marijan Kvesić.

U rubrici ovog Newsletter-a **Intervju sa...** možete u cjelosti pročitati intervju sa g. Divcem.



IN MEMORIAM - SEAD HADŽIJAHIĆ



Sa neizmjernom tugom i dubokim poštovanjem se opraštamo sa doajenom bh. sportskog novinarstva i članom Olimpijske porodice, čiji je doprinos sportskoj bh. zajednici izuzetan

Sead Hadžijahić, rođen je u Zagrebu 14.05.1943. godine, te je jedan od najprepoznatljivijih sportskih komentatora u regiji.

Počeo je kao jedan od pionira sportskog novinarstva 1969. godine. Za četiri decenije predanog rada, realizovao je preko 2.000 televizijskih prenosa i izvještavao s 9 olimpijskih igara, uključujući i zimsku Olimpijadu u Sarajevu 1984. godine, na kojoj je bio jedan od rukovodilaca kompletnog programsko – produkcijskog projekta tadašnjeg JRT-a.

SPORTSKI SAVEZI BIH



Košarkaška reprezentacija BiH kvalifikovana na EUROBASKET 2022

Košarkaši BiH se odličnom igrom, dva kola pred kraj kvalifikacija, plasirali na Eurobasket 2022.

Fantastičnom igrom i velikom borbenošću bh. košarkaši ostvarili su dvije pobjede proteklih dana i time osigurali svoj deseti nastup na Eurobasketu.

Nastavak kvalifikacija otvorili su ubjedljivom pobjedom na domaćem terenu u Sarajevu protiv Bugarske rezultatom 88:49.

Svoj kvalitet potvrdili su na domaćem terenu pobjeđivši Latviju rezultatom 79:73.

Olimpijski komitet BiH upućuje iskrene čestitke svim igračima, trenerima, stručnom štabu, kao i Košarkaškom savezu BiH.

Do kraja kvalifikacija našu reprezentaciju očekuju utakmice protiv Grčke 19. februara i Bugarske 22. februara 2021. godine.



Tara Bohatjuk osvojila bronzanu medalju na Evropskom juniorskom prvenstvu u amaterskom boksu

Mlada bosanskohercegovačka bokserka Tara Bohatjuk osvojila je bronzanu medalju na Evropskom juniorskom prvenstvu u amaterskom boksu koje se ove godine održalo u Budvi (Crna Gora), što je tek druga evropska medalja za BiH.

Tara Bohatjuk, koja je članica Bokserskog kluba "Novi grad" (Sarajevo) i reprezentacije BiH je na evropskom prvenstvu ostvarila pobjedu protiv prvakinje Španije, čime je osigurala bronzanu medalju. Meč za ulazak u finale je nažalost izgubila od domaće bokserke Bojane Gojković inače aktualne evropske prvakinje.

Naša Tara se morala zadovoljiti bronzanom medaljom što je samo po sebi ogroman uspjeh i za ovu mladu BiH bokserku i za BiH sport općenito.

Tara je izjavila kako je prezadovoljna svojim nastupom na evropskom prvenstvu:

"Želim da se zahvalim svom klubu "Novi Grad" koji me podržavao i pratio u svakom koraku na evropskom prvenstvu kao i Bokserskom savezu BiH bez kojih sve ovo ne bi bilo ni zamislivo. Ostvarila sam pobjedu protiv prvakinje Španije i zadovoljna sam svojim nastupom. Ovom prilikom također se želim zahvaliti mojim trenerima Jasminu Pešteku i Redžepu Haliloviću jer su mi pružili ovu priliku. Ništa ne bi bilo moguće bez ljubavi koja mi je pružena i bez povjerenja u moje trenere. Došla sam po pobjedu svjesna da je najteže uzeti nekom ono što tvrdi da je već njegovo."

Iz Bokserskog kluba "Novi Grad" navode kako je ovo prva evropska medalja za klub a ujedno tek druga za BiH. Zadovoljni su činjenicom da su nakon 15 godina rada i učešća na 10 evropskih prvenstava uspjeli osvojiti medalju ovog ranga što je dokaz istrajnosti te kvaliteta i kontinuiteta rada u klubu.



Taekwondo savez BiH domaćin dva evropska prvenstva



Bosna i Hercegovina je bila domaćin Evropskog prvenstva za seniore u olimpijskim kategorijama i kadete. Ukupno 335 takmičara iz 33 zemlje Evrope učestvovalo je u takmičenju koje je organizovano pod striktnim sigurnosnim uslovima zbog pandemije virusa Covid-19. Svi takmičari i učesnici morali su imati negativan test, a takmičenje je organizovano u tzv. balon sistemu.

Predstavnici Evropske Taekwondo Federacije istakli su kako je organizacija Taekwondo saveza Bosne i Hercegovine bila na odličnom nivou, te da će i u budućnosti organizovati vrhunska takmičenja u BiH.

Osam medalja za Taekwondo reprezentaciju BiH i drugo mjesto u ukupnom poretku za kadete na Evropskom prvenstvu održanom u Bosni i Hercegovini

Kadetska reprezentacija Bosne i Hercegovine ostvarila je sjajan rezultat na Evropskom prvenstvu u taekwondou održanom u Sarajevu.

Reprezentacija BiH, predvođena trenerima Ibrahimom Koljom, Mladenom Ristićem i Ivanom Krajinom osvojila je ukupno osam medalja, od čega dvije zlatne, tri srebrene i tri bronzane.

Bh. kadeti plasirali su se na drugo mjesto u ukupnom poretku, a u ukupnom poretku kadeta i kadetkinja naša reprezentacija zauzela je četvrto mjesto.

Osvajači zlatnih medalja među kadetima bili su Fahrudin Adilović u kategoriji do 57 kilograma i Benjamin Husić u kategoriji do 53 kilograma. Srebrene je bio Benjamin Ibrahimkadić u kategoriji do 65 kilograma, dok je bronzani bio Omer Mehmedović u kategoriji do 33 kilograma.



Među kadetkinjama najbolje su se pokazale Ira Grgić koja je osvojila srebrnu medalju u kategoriji do 59 kilograma, i Milica Vasić u kategoriji do 37 kilograma. Bronzane medalje Bosni i Hercegovini donijeli su Jelena Vasić u kategoriji do 44 kilograma, i Ejla Makaš u kategoriji do 33 kilograma.

19 medalja za bh. takmičare na 8. Otvorenom evropskom klupskom prvenstvu u taekwondou

Bh. takmičari završili su 8. Otvoreno evropsko klupsko prvenstvo u Taekwondou osvajanjem ukupno 19 medalja.

Bosnu i Hercegovinu je na ovom takmičenju predstavljalo 28 takmičara iz devet klubova, a najbolje rezultate ostvarili su sljedeći takmičari:

KADETI

- Fahrudin Adilović, Taekwondo klub Bosna Visoko, zlatna medalja, kategorija kadeti -57kg,
- Milica Vasić, Taekwondo klub Brčko, bronzana medalja, kategorija kadeti -37kg
- Jelena Vasić, Taekwondo klub Brčko, bronzana medalja, kategorija kadeti, -45kg



JUNIORI

- Ada Avdagić, Taekwondo klub Sarajevo, zlatna medalja, kategorija juniori -42kg,



- Njegoš Pantić, Taekwondo klub Jopa Bijeljina, bronzana medalja, kategorija juniori -51kg
- Nadina Mehmedović, Taekwondo akademija Tešanj, kategorija juniori -63kg

SENIORI do 21 godine

- Nedžad Husić, Taekwondo klub Novi Grad, zlatna medalja, seniori do 21 godine, -68kg
- Jusuf Ali Rašidagić, Taekwondo klub Novi Grad, zlatna medalja, seniori do 21

godine, -80kg

- Džejlja Makaš, Taekwondo klub Novi Grad, zlatna medalja, seniori do 21 godine, -49kg
- Katarina Krašnik, Taekwondo klub Novi Grad, zlatna medalja, seniori do 21 godine, -53kg
- Sadmira Habibović, Taekwondo klub Novi Grad, srebrna medalja, seniori do 21 godine, 63kg
- Timur Subašić, Taekwondo klub Novi Grad, bronzana medalja, seniori do 21 godine, -74kg

SENIORI

- Marija Štetić, Taekwondo klub Fojnica, zlatna medalja, seniori, -62kg
- Emir Kaljanac, Taekwondo klub Novi Grad, zlatna medalja, seniori -63kg
- Nedžad Husić, Taekwondo klub Novi Grad, srebrna medalja, seniori -68kg
- Sadmira Habibović, Taekwondo klub Novi Grad, srebrna medalja, seniori -63kg
- Erol Nući, Taekwondo klub Mladost Sarajevo, zlatna medalja, seniori -87kg
- Dora Marušić, Taekwondo klub Mladost Sarajevo, srebrna medalja, seniori -73kg
- Ivana Šarenac, Taekwondo klub Brčko, srebrna medalja, -67kg

Čestitke upućujemo sportistima i trenerima, kao i Taekwondo savezu Bosne i Hercegovine, te se nadamo još mnogo većim uspjesima bh. takmičara u skorije vrijeme.



Odličan nastup Mirze Nikolajeva u Svjetskom sankoškom kupu



Naš najbolji sankoš, Mirza Nikolajev, koji je ujedno i stipendista OK BiH za predstojeće Zimske olimpijske igre Peking 2022, trenutno nastupa u Svjetskom sankoškom kupu za seniore. Četvrta trka ove sezone završena je, a ukupno ima 10 trka.

Treba uzeti u obzir da je Mirza junior, ali zbog izuzetno dobrih rezultata nastupa u seniorskoj konkurenciji i trenutno zauzima 31. mjesto u ukupnom poretku. Sezona traje do februara 2021. godine, a

Mirza je već sada osvojio dovoljan broj bodova, te se tako bodovno uspio kvalifikovati za Olimpijske igre Peking 2022. Do kraja sezone je potrebno da ostane u prvih 36 takmičara, kako bi osigurao svoj nastup na ZOI Peking 2022.

Pogledajte Mirzin spust, sa kojim je osvojio bodove za kvalifikaciju na ZOI Peking 2022, na sljedećem [linku](#).

OK BiH mu želi mnogo sreće u preostalim trkama.

Najveći uspjeh BiH dizanja tegova od 1992. godine do danas

Sa velikom radošću javljamo da je Nejla Kalača, četrnaestogodišnja djevojčica, reprezentativka Bosne i Hercegovine, osvojila sedmo mjesto na Svjetskom online prvenstvu u konkurenciji do 17 godina. Napominjemo da će Nejla još 3 godine moći nastupati u ovoj konkurenciji, i da se takmičila sa mnogim konkurentkinjama koje su starije od nje tri godine.



Uspjeh je još veći kada znamo da je na ovom prvenstvu predviđen nastup 402 takmičara i takmičarki, od čega su 184 takmičarke. Iako nisu zastupljene takmičarke iz svih država u IWF-u, ipak je na ovom Svjetskom Prvenstvu učešće uzelo 64 države.

Savez dizača tegova je imao uspjeha na Evropskim prvenstvima (osmo mjesto Eldina Omerovića, peto mjesto Olivera Jurić), ali na Svjetskim Prvenstvima do sada nismo imali bolji plasman od desetog mjesta.

Čestitamo Nejli Kalači, njenom treneru i Savezu dizača tegova BiH na ostvarenom uspjehu.

Predstavljenje najbolje bh kajakašice na divljim vodama

Lejla Slipić je rođena 2002. godine i svoju uspješnu sportsku karijeru započela je 2014. godine kao pionirka kada je na međunarodnom takmičenju u Zavidovićima ubjedljivo trijumfovala u svojoj kategoriji i već iste godine na još jednom međunarodnom takmičenju u Banja Luci potvrdila svoj kvalitet osvajanjem drugog mjesta na Argo kupu.



Od njenih najvećih uspjeha svakako je vrijedno istaknuti da je 2016. kadetska a 2017. juniorska prvakinja BiH u slalomu na divljim vodama (olimpijska disciplina).

Tokom 2020. godine učestvovala je na 4 takmičenja na kojima je postigla slijedeće rezultate:

- 2. mjesto na Memorijalnom takmičenju u Čačku u disciplini klasični spust,
- 4. mjesto u juniorskoj konkurenciji i 3. mjesto u seniorskoj konkurenciji disciplina sprint, na Otvorenom državnom prvenstvu R.Srbije u Ušću,
- 1. mjesto i zlatna medalja na Otvorenom prvenstvu R.Srbije u klasičnom spustu u seniorskoj konkurenciji u Kraljevu i
- 1. mjesto i zlatna medalja na Oktobarskom memorijalu grada Kraljevo u juniorskoj konkurenciji.

Evropsko prvenstvo u Ritmičkoj gimnastici Kiev 2020



Reprezentacija Ritmičke gimnastike BiH nakon učešća na 36. EP Kiev ostvarila je značajne rezultate koji su stvorili pretpostavke i omogućili još četiri pokušaja na narednim takmičenjima Evropskog i Svjetskog nivoa u 2021 za ostvarenje Olimpijske norme Tokio 2020.

Najznačajniji rezultat ostvarila je najmlađa seniorka na EP, Hana Kahrman koja je među najboljima Evrope zauzela 25 mjesto u višeboju, te tako ostvarila najbolji plasman svih

vremena jedne BiH seniorke na Evropskom i Svjetskom nivou.

Reprezentacija Skijaškog saveza BiH



Zimskim olimpijskim igrama u Pekingu 2022.

Naša dva najbolja skijaša, Marko Šljivić i Emir Lokmić, otputovali su u Sloveniju, gdje se održalo otvoreno Državno prvenstvo Slovenije. U velikoj konkurenciji takmičara iz Slovenije, Italije, Austrije, Njemačke, Bugarske, Hrvatske naši dečki su zauzeli mjesta na podijumu. Marko je prvog dana takmičenja u disciplini slalom zauzeo 3. mjesto, dok je Emir također zauzeo 3. mjesto drugog dana takmičenja.

Naši ski trkači, Stefan Anić i Strahinja Erić, također su ovog vikend nastupali na trkama Svjetskog kupa.

Članovi reprezentacija Skijaškog saveza BiH su imali nastupe diljem Evrope. Svi članovi reprezentacije su stipendisti OK BiH, i koračaju ka ostvarenje Olimpijske norme.

Elvedina Muzaferija je u Val d'Isere nastupala na Svjetskom kupu u brzim disciplinama. Elvedina je vozila dvije trke Spusta i jednu trku Super G, a svojim rezultatima uspjela je ostvariti normu za nastup na



Karate savez Federacije BiH dodijelio počasno majstorsko zvanje Amelu Tuki




Da li ste znali da se naš najbolji atletičar u historiji, Amel Tuka, prije uspješne karijere atletičara takmičio u drugom sportu?

U prostorijama Olimpijskog komiteta BiH, Karate savez FBiH dodijelio je Amelu Tuki počasno majstorsko zvanje, majstor karate sporta 3.Dan.

Svečanost dodjeli priznanja prisustvovali su potpredsjednik Karate saveza BiH Mujo Gec i sekretar Federalnog saveza Admir Zukan.

EU PROJEKTI



MUZEJSKE PRIČE - ONLINE APLIKACIJA

Posjetite Olimpijski muzej u Sarajevu iz udobnosti vašeg doma!

Želite se upoznati sa bogatom Olimpijskom baštinom Bosne i Hercegovine a niste u mogućnosti posjetiti Olimpijski muzej u Sarajevu?

U okviru projekta Muzejske priče, koji se realizuje u sklopu programa IPA prekogranična saradnja Srbija - BiH, Olimpijski komitet Bosne i Hercegovine je također jedan od korisnika projekta. Kao jedna od aktivnosti projekta napravljena je aplikacija interaktivnog multimedijalnog vodiča za 11 muzeja prekograničnog područja.

Online aplikacija nudi mogućnosti da u vremenu COVID-19 pogledate neke od najvrijednijih eksponata Olimpijskog muzeja u Sarajevu, te se upoznate sa našom bogatom Olimpijskom baštinom bezbjedno iz udobnosti vašeg doma.

Sve što je potrebno jeste da snimate aplikaciju sa sljedećeg linka na vaš mobilni uređaj/tablet

Aplikaciju možete preuzeti [ovdje](#).

Vidimo se u Olimpijskom muzeju u Sarajevu!

Intervju sa **Vlade Divac**



OK BiH: *Kako je po Vama COVID-19 pandemija uticala na sport u regionu?*

Vlade Divac: Ne samo da je uticala na region. U celom svetu se i dalje traže rešenja kako i na koji način sport ostaviti u životu, ali svakako da je pandemija zadala veliki udarac na sport.

OK BiH: *Možete li povući paralelu između evropske i američke košarke?*

Vlade Divac: Velika je razlika i u fizičkom i u mentalnom smislu, a drugačija su i pravila. Međutim, drago mi je da sve više igrača iz regiona pronalazi način da nađe svoj put i zaigra u NBA ligi.

OK BiH: *Bili ste dio olimpijske porodice koja je aktivno podržavala kandidaturu OK BiH za EYOF 2019, kakve su Vaše impresije Sarajeva nakon EYOF-a?*

Vlade Divac: Pre svega, mnogo sam ponosan na sve nas koji smo učestvovali u dovođenju EYOF-a u Sarajevo i Istočno Sarajevo, a onda i presrećan kako je Olimpijski komitet Bosne i Hercegovine organizovao događaj. Benefite nije imao samo Olimpijski komitet BiH, nego i gradovi Sarajevo i Istočno Sarajevo, kao i sama Bosna i Hercegovina i celi region.



OK BiH: *Koje je Vaše najveće sportsko dostignuće?*

Vlade Divac: To je veoma teško pitanje iz prostog razloga što je moja karijera jako dugo trajala i veoma je teško izabrati jedan momenat. Ponosan sam na svaku pobjedu i svaki lep trenutak, a bilo ih je mnogo.

OK BiH: *Uzevši u obzir da ste vrhunski sportista, te ujedno bili Predsjednik OK Srbije, koje je Vaše mišljenje po pitanju dualnih karijera vrhunskih sportista i šta biste po tom pitanju poručili bh. vrhunskim sportistima?*

Vlade Divac: Meni je sport dao mnogo toga, ali pre svega mnogo prijatelja. Samim tim moj angažman u Olimpijskoj porodici se oplemenio sa novim prijateljima koji su pre svega ovde iz regiona, ali i iz celog sveta. Sport zbližava ljude i to je po meni najveća vrednost sporta, a i sportista. Sportisti znaju da je ovaj svet mali, za sve nas, i da smo mi svi na istom zadatku, da gradimo bolju budućnost za sve nas u kojoj će nam biti lepše i bolje.



ZAVIRITE U DRUŠTVENE MREŽE OK BiH (klikom na sliku)



Pratite nas na društvenim mrežama:
(klikom na ikone)



©2020. Olimpijski komitet Bosne i Hercegovine. Sva prava zadržana.
www.okbih.ba

Specijalnu zahvalnost dugujemo sponzorima i partnerima OK BiH.
Klikom na logo posjetite njihove oficijelne stranice.



SARAJEVO OSIGURANJE